

Newspaper	UTUSAN MALAYSIA
Date	30 NOVEMBER 2016

Najib, 6 bekas presiden UMNO 'hadir'

um - 30/11/2016

KUALA LUMPUR 29 Nov. - Dengan kecanggihan teknologi hologram 3D, enam bekas presiden UMNO petang ini ditampilkan di atas pentas bersama-sama Perdana Menteri yang juga Presiden UMNO Datuk Seri Najib Tun Razak.

Mereka menyaksikan upacara bersejarah perasmian secara simbolik pecah tanah projek pembangunan kompleks Pusat Dagangan Dunia KL Putra (KL PWTC), yang akan menjadi mercu tanda ikonik baru di ibu negara.

Keenam-enam mereka ialah Allahyarham Datuk Onn Jaafar yang merupakan pengasas dan Presiden UMNO yang pertama, Almarhum Tunku Abdul Rahman Putra Al-Haj, Allahyarham Tun Abdul Razak Hussein, Allahyarham Tun Hussein Onn, Tun Dr. Mahathir Mohamad dan Tun Abdullah Ahmad Badawi.

Penampilan mereka pada acara berkenaan yang dipancarkan di layar gergasi yang memenuhi segenap ruang dinding dewan di

mana acara itu berlangsung 'seolah-olah' mereka menyaksikan upacara bersejarah itu.

Kesemua mereka yang berpakaian baju Melayu lengkap dengan sampung dan songkok, tampil selama dua minit di atas pentas utama sebagai simbolik gabungan tenaga untuk legasi dan kejayaan UMNO.

Pada acara itu Najib dan kesemua bekas presiden UMNO, telah bersama-sama melaungkan 'Hidup UMNO' sebanyak tiga kali.